



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno DLXXVII. ad annum DXC.

Parisiis, 1644

Epistola VIII. Gregorii Papae I. Ad Leonem Episcopvm Primae Ivstinianae.
De vsu pallii, & cura pastorali diligenter exhibenda.

urn:nbn:de:hbz:466:1-15221

EPISTOLA VII.

GREGORII PAPÆ I.

AD EPISCOPOS ILLYRICI.

Ordinationem Ioannis episcopi apostolica auctoritate confirmatam.

Gregorius vniuersis episcopis per Illyricum.

ET nobis confert de solitudine vestra latitiam, & fraternitatem vestram de sua reddit ordinatione securam, si antiquæ consuetudinis ordo seruatur. Quia ergo ex epistolis quas ad nos per Maximianum presbyterum & Andream diaconum direxistis, in persona Ioannis fratris & coepiscopi nostri consensum omnium vestrum & serenissimi principis conuenisse cognouimus voluntatem, magna nos exultatio habuit, talem Deo auctore ad sacerdotii officium fuisse prouectum, qui dignus cunctorum est electionis iudicio comprobatus. Proinde iuxta postulationis vestræ desiderium, prædictum fratrem & coepiscopum nostrum in eo in quo est sacerdotii ordine constitutus nostri assensus auctoritate firmamus, ratamque nos eius consecrationem habere dirigentes pallium indicamus. Cui quoniam iuxta morem nostras vices commisimus peragendas, ideo fraternitatem vestram necessario præuidimus adhortandam, quatenus ei in his quæ ad ordinem ecclesiasticum rectitudinemque pertinent disciplinæ, siue in aliis quibus Canonum decreta non obstant, parere nullo modo differatis, vt caritatem vestram sincero eum iudicio elegisse exhibita valeat obedientia declarare.

EPISTOLA VIII.

GREGORII PAPÆ I.

AD LEONEM EPISCOPVM PRIMÆ IVSTINIANÆ.

De usu pallii, & cura pastoralis diligenter exhibenda.

Gregorius Joanni episcopo primæ Iustinianæ Illyrici.

MANIFESTVM bonitatis esse liquet indicium, in vnus
 electione cunctorum conuenire consensum. Quia
 igitur suscepta fratrum & coepiscoporum nostrorum re-

Grat. dist.
63. c. Quia.

latio ad locum vos sacerdotii totius Concilii vnito consensu & serenissimi principis voluntate declarat accersiri; gratias omnipotenti Deo creatori nostro magna cum exultatione retulimus, qui vitam actusque vestros ita de præteritis fecit esse probabiles, vt omnium vos, quod est valde laudabile, faceret placere iudicio. Quibus nos quoque in personam fraternitatis tuæ per omnia consentimus, atque omnipotentem Dominum deprecamur, vt caritatem vestram sicut sua gratia elegit, ita in omnibus sua protectione custodiat. Pallium vero ex more transmisiimus, & vices vos apostolicæ sedis agere iterata in nouatione decernimus, admonentes vt ita vos circa subiectos debeatis exhibere placabiles, vt rectitudinem vestram diligere prouocentur potius quam timere. Quorum si culpa forte poposcerit, ita excessus emendare curabitis, vt paternum affectum de animo nullo modo relinquatis. Estote in custodia commissi gregis vigilantes atque solliciti, & disciplina zelo districti, ne lupo insidians, nec ouile turbare dominicum, nec nocere ouibus aliqua fraudis occasione proualeat. Animarum lucrum Deo nostro tota mentis intentione ferre festinate: nomen nos pastoris non ad quietem, sed ad laborem suscepisse cognoscite. Exhibeamus ergo in opere quod signamur in nomine. Sacerdotii prærogatiuam si recta consideratione pensemus, sollicitis & benegredientibus in honore, negligentibus autem profecto erit in onere. Sicut igitur laborantes, & circa animarum salutem sollicitos hoc nomen ante Deum æternā ducit ad gloriam, ita desides ac torpentes vrget ad pœnam. In lingua vestra vitam esse aliam plebs commissæ agnoscat. Sit illis fraternitatis vestræ doctrina, gratus coercionis stimulus, & vita, imitationis exemplum. Quid enim diligere, & quid timere debeant, caritatis vestræ sermo prædicationis aperiat, fructum efficacia vestra æternæ huiusmodi retributionis acquirat. Inter hæc vero & huiusmodi ista vos principaliter deliberationis cura constingat, ne vnquam ordinationes facere tentetis illicitas, sed si quos ad clericatus ordinem vel potiore forte gradum promoueri contigerit, non præmiis aut precibus, sed meritis ordinentur. In nulla ordinatione fraternitati vestræ commoda quolibet modo surrepant, ne laqueis simoniacæ, quod absit, hæreseos
illige-

illigetur. *Quid enim prodest homini, sicut veritas docet, si totum mundum acquirat, & suæ faciat animæ detrimentum?* Vnde necesse est vt Deum in omni quod gerimus attendamus, peritura & temporalia contemnamus, atque ad æternitatis bona cordis desiderium dirigamus. Xenia autem vestræ sanctitatis suscipere omnino nolueram; quia valde esset incongruum, vt a prædatis atque afflictis fratribus munera percepisse videremur. Sed responsales vestri alio me argumento vicerunt, adeum illa deferentes, a quo non possent oblationes vestræ fraternitatis repelli. Illud enim vobis præ omnibus studendum est, vt venturo iudici animarum, sicut prædiximus, non peritura munera procuretis, quatenus & vos de vestra mercedis operatione, & nos pariter de nostra adhortatione respiciat.

EPISTOLA IX.

GREGORII PAPÆ I.

AD PETRVM NOTARIVM IN SARDINIA.

De ministeriis Aleriensis ecclesiæ recipiendis.

Gregorius Petro notario in Sardinia.

MINISTERIA ecclesiæ Aleriensis, quæ secum Scyllacium quondam episcopus Seuerinus detulerat, præsentium sibi portitores restitui postulant. Quia ergo res ecclesiasticæ cauta debent solitudine præmuniri, hoc nobis visum est, vt in eadem ecclesia seu ciuitate episcopus, cui ministeria ipsa tradi possint, debeat ordinari. Sed quoniam Leonem archidiaconum, aliosque clericos eiusdem ecclesiæ illic esse commemorant; experientiæ tuæ præcipimus, quatenus eos ad suam ecclesiam proficisci, ac eligere ordinandum episcopum sibi commoneat: vt dum Deo illic fuerit propitio consecratus, ipse ecclesiæ suæ res sine aliqua ambiguitate recipiat.